

## L26 ‘Mukanda kukonda Ndinga’ kele nki?

Mukanda kukonda Ndinga kele mukanda ya papier to ya lele. Yo kele na bandinga na kati ve, kansi kaka bacouleur. Yo kele na matiti tanu, ti konso dititi kele couleur ya nkaka. Bacoleur yai na ndonga yai: Or to jaune, ndombe, mbwaki (rouge), mpembe, couleur ya saka-saka (vert).

Kana nge kele na mukanda bonso yai ve, nge lenda sala yo. Kaka sosa matiti to bitini ya bilele ya bacouleur yina. Tunga yo to kanga yo na pengele na kwue mosi. Kana bacravola to bamarquer ikele, nge mosi lenda colorer papier ordinaire.

Nge lenda sadila mukanda ya bacouleur yai kutendula nsangu ya Yesu na bana. Bamoniteur lenda sadila yo na nsuka ya lesu ya ecole du dimanche, kana bana ya nkaka kwisa na nima nge binga bavidi kutula ntima na Yesu. Nge tendula nsangu ya mbote na bacouleur ya mukanda. Kaka landa guide ya ke yantika na dititi ya zole na ndentula yai.

Nge lenda sadila mukanda yai kulonga nsangu ya Yesu na bana nge mona na bala-bala. Yula bo kana bo me mona ntete mukanda ya kele na ata ndinga mosi ve na kati, kansi yo songa histoire ya kitoko. Kana bo tuba ‘ve,’ yula kana bo zola nge kusonga yo ti kusonga bo histoire na yo. Na nsuka, songa bo nde kana bo me tula ntima na Yesu ntete ve kansi bo zola kusala yo bubu, bo kwisa kuta nge na nima na sika ya nge ta songa bo. Kana ndambu kwisa, pesa bo encouragement kusamba ti kusonga Yesu nde bo zola kubalula ntima, kuyantika kulanda Yandi.

Nge lenda sadila yo kulonga bana na nge mosi, bampangi ya fami, ti bana ya zinga penepene. Bambuka nde, kikuma kele kutendula mbote-mbote nzila ya mpulusu, na mpila nde, ntangu Mpeve bula na ntima ya mwana, yandi ta vanda na mpila kuyamba Yesu Kristo. Kana mwana (to kana konso muntu) tuba bandinga ya lombilu kuyamba Yesu, yandi ta guluka KAKA kana lombilu yina kieleka ke basika na ntima ya ke mona mpasi sambu na masumu, ya kwikila Yesu ti zola kulanda yandi. Kana mwana me sola Yesu ve, kutuba bandinga yina ta sala yandi kima ve.

Bika Nzambi sadisa nge kutwadisa bana mungi na Yesu na mukanda yai.-



## Mukanda Kukonda Bandinga (Mukanda kaka ya bakulere)

Nki mutindu kusadila yo --

### Mpila mosi ya kuyantika :


Nani me mona mukanda ya ke songa beto histoire ya kitoko, kansi na kati na yo, ata ndinga mosi ikele ve ? Awa mono kele na mukanda. Beno lenda mona nde yo kele na bandinga ve. Kansi yo ke songa beto histoire ya kitoko kuluta bahistoire yonso ya nkaka. Keti beno ta zola kuwa histoire yo ke songa beto ?

**Kuyantika dititi ya ntete: Nani kele kitoko yonso, mbote yonso? Nani ke na kiyeka kusonga beto nki mutindu kuzinga? Kaka Mfumu Nzambi, Yandi mosi. Kulere yai wolo ke songa lukumu na Yandi.**

### DITITI YA WOLO

Malongi ya dititi yai : KULERE YAI WOLO KE SONGA LUKUMU YA NZAMBI.

1. Kulere ya kitoko yai ke bambukisa mono ya lukumu ya Nzambi, Yandi kitoko, Yandi suntu, Yandi mbote na mambu yonso.
2. Nzambi kele nani ? Yandi me zinga mvu ya mvu, ngangi ya bima yonso. Yo yina, Yandi ke na kiyeka kusonga beto nki kusala, sambu Yandi salaka beto.
3. Yandi kele nene, ti Yandi kele kulunga nde beto lemfuka na Yandi ti zitisa Yandi.




Verse ya Bible : ...Beno vila ve nde Mfumu Nzambi kele Nzambi na zulu ti na nsi-ntoto. Nzambi ya nkaka ikele ve. Kulonga 4 :39

**KUKOTA DITITI YA 2: Kansi, beto kele na probleme ya nene. Bibuti na beto ya ntete vilaka nzila ya Nzambi kusala luzolo na bo mosi, ti beto me landa kaka na nzila yina ya mbi. Beto yonso me sala masumu mingi. Yo yina, beto kele na makambu ya nene na ntwala ya Nzambi ya suntu. Yai nsangu ya mawa, ya lufwa !**

### DITITI YA NDOMBE, YA MVINDU

Malongi ya dititi yai : NGE KE NA PROBLEME SAMBU NA MASUMU NA NGE.

1. Bible ke songa beto, « Bantu yonso me salaka masumu... » (Roma 3:23). « Beto yonso, beto vandaka kuyungana bonso mameme, konso muntu na nzila na yandi... » (Yezaya 53 :6a)
2. Masumu kele nki ? Konso mambu ya pesa Nzambi kiese ve, ya ke lemfuka ve na bansiku na Yandi. Yo kele kupesa Nzambi mukongo, kulanda nzila na beto mosi. Mbandu: Bonso nki ? (Yula bana.) Muyibi, luvunu.... Keti nge me sala mambu ya Nzambi zola ve ? Ee, mingi.
3. Masumu me fwaka kinduku na beto ti Nzambi. Yo me natila beto ndola ti lufwa.




Verse ya Bible : Roma 3:23a “Bantu yonso me salaka masumu...”

**KUKOTA DITITI YA 3 :** Kansi ata beto me pesa Nzambi mukongo, Yandi zolaka beto mingi. Na mawa na Yandi, Yandi yidikaka nzila ya lenda katula masumu na beto, sambu Yandi fweti pesa beto ndola ve. Yo yina, Yandi tindaka Mwana na Yandi Yesu Kristo, Yandi baka ndola na beto, Yandi kufwa na sika na beto.

### DITITI YA MBWAKI

Malongi ya dititi yai : **YESU PESAKA MENGA NA YANDI.**  
**YANDI FWAKA BONSO NKAILU NA SIKI NA BETO.**

1. Yesu vandaka nani ? Yandi Mwana kitoko ya Nzambi.
2. Yandi ndimaka kubaka ndola na beto.
3. Yandi pesaka menga na Yandi bonso nkailu ya kulunga na sika na beto.
4. Yandi fwaka na zulu ya kulunsi ; Yandi telamaka na lufwa. Yandi ke na moyo bubu !
5. Kisalu na Yandi me mana, yo yina Yandi vutukaka na zulu.




Baverse ya Bible : 1 Korinto 15 :3-4 “Kristo fwaka sambu na masumu na beto... Bo zikaka Yandi, ebuna Nzambi tedimisaka Yandi na lufwa...” Roma 5:8 “...Kristo fwaka sambu na beto...”

**KUKOTA DITITI YA 4 :** Na lufwa na Yandi, Yesu futaka ndola yonso ya masumu na nge. Yo yina, ntangu yai, Yandi lenda lolula nge. Yandi lenda katula masumu na nge ti yobisa ntima na nge, yo kuma kitoko. Yandi lenda pesa nge ntima ya mpa ya zola kulanda Yandi. Keti nge ta zola kundima Yesu, kuyamba Yandi bonso Mvulusi na nge ?

### DITITI YA MPEMBE, YA KUSUKULA

Malongi ya dititi yai : **NZAMBI TA SUKULA NTIMA NA NGE NTANGU BETO TULA YESU NTIMA.** **YANDI PESA NGE NTIMA TI MOYO YA MPA.**

1. Kukuma mbote ti Nzambi, nge fweti balula ntima na Yesu. Yai zola tuba nde nge bika kukwenda nzila ya nge mosi, nge balula, nge kwenda na nzila ya Yesu. Nge sosa nzila ya nkaka ve kuguluka, kansi kaka Yandi.
2. **Keti Mpeve ya Nzambi ke songa na ntima na nge nde nge ke na mfunu ya Yesu?** Keti nge me yilama kubika kuzinga na nzila ya nge mosi, kuyantika kulanda Yandi?
3. **Kana nge me yilama, nge lenda binga Yandi sesepiyai. Tula Yandi ntima. [Moniteur, konso mwana ya me yilama kundima Yesu lenda samba. Bo lenda songa Yandi nde bo ke na mfunu na Yandi, bo zola tula Yandi ntima bubuyai.]**
4. Kana nge me yamba Yesu, masumu na nge kele wapi ? (Nzambi me katula yo.)



Baverse ya Bible : Efezo 1:7 “Sambu na menga ya Kristo beto kele diaka bampika ya masumu ve, Nzambi me lolulaka beto...”


**KUKOTA DITITI YA 5: Kana kieleka nge me yamba Yesu, me tula ntima na Yandi, nge ta yantika kuyela na kikristo, ti nge ta landa kaka kulanda Yandi.**

## DITITI YA KOLERE SAKA-SAKA

Malongi ya dititi yai : **MUNTU YA ME YAMBA YESU, YANDI TA YELA NA KIKRISTO.**

Na nima nge me yamba Yesu, nge ta zola kuyela na Yandi :

1. Samba Nzambi konso lumbu. Tonda Yandi ti pesa Yandi lukumu.
2. Tanga to kuwa Bible na nzala na kulemfuka na yo.
3. Samba ti bakristo ya nkaka na dibundu.
4. Songa bantu ya nkaka Nsangu ya Yesu.
5. Kana nge sala masumu diaka, yo ta pesa nge mawa. Kwenda nswalu na Yesu. Ndima yo ti bika yo. Yandi ta lolula nge ti pesa nge ngolo kubika mambu yina.



Kana mpila ikele, baka zina ya mwana yonso, ti addresse to mpila kucontacter yandi. Lomba yandi kusamba sambu na kutonda Yesu. Na nima, nge samba bisambu mosi ya matondo nde mwana yina me kwisa na Yesu. To, kana yandi me yamba Yesu dezia, tonda Nzambi nde yandi kele kuzaba Yesu. Samba nde yandi ta yela, ta kuma ngolo na lukwikilu na yandi. Kana dibundu na nge ke botika bana ya me kwikila, pesa yandi ngindu kukwenda kusonika zina na yandi sambu na malongi ya mbotika.

Pesa yandi konso information ya nkaka ya lenda sadisa yandi kuyela na kikristo na yandi, bonso programme « Bible Kitoko » sambu na bana na FM 89.

Nge me twadisa mwana na Yesu ! Bawanzio na zulu kele kuyangala. Bika Nzambi kusakumuna nge !

### **LONGI, Kumanisa, yula mwana:**

« Na mpila nge bakisa, nki me salama sesepiyai ? »

Mvutu na kestio yai lenda sadisa nge kuzaba kana mwana me bakisa.

Nge me longa nsangu ya mbote na mwana ! Mbala ya nkaka, nge me twadisa mwana na Yesu ! Kana mwana me balula ntima, bawanzio na zulu kele kuyangala. Bika Nzambi kusakumuna nge !